



*Jumat, 17 September 2021*

**Ogen: Jop 29:24**



**Cirem Dingen Siang Ayo**



Cirem....

Katawari nge kita si rusurna cirem dengen siang ayonta? Lit si ngatakenca maka i bas kita sitatapen ras kamere entah pe erpoto/erselfi. Adi erpoto kita usur ikataken cis..., dungna kita pe senyum. La ateta berjut sabap la mejile ulihna foto e. E maka mekatap nge adi kita erfoto sinen ulihna janah adi kurang jile si akap, minter si hapus dengen si ganti ka alu foto si mbaru. Cirem sada perbahanen si mesunah tapi lit deba jarang kal ngelakokenca entah paksa-paksa tertentu saja ngenca ia cirem umpamana erpoto, jumpa teman meriah dengen sangana meriah kin ukurna. Kalak si cirem mejile man tatapen, meriah ukur janah kalak sinatapsa danme akapna. Alu bage cirem enda e erbahanca kita reh jilena.

"Adi ndele ate kalak kuciremi ia, janah ngidah ayoku siang, ergiah-giah minter ukurna" nina Job. Teridah maka Job cirem nandangi kalak si erndele ate, tujunna mpegegehi kalak si sangana erceda ate. Ayona siang penjemba man kalak sideban guna banci mpeturah semangat nggeluh. Si jadi penungkunen, la kin lit perbeben si Jop, enggo kin kerina si jadi bagi ukurna? Lang... bagi si eteh maka Jop pe ngalaken erbage-bage perbeben tapi situasi kegeluhen entah pe perbeben geluh la erbahanca ia berjut.

Uga kita? Banci nge kita ngusih perbahanen Job e? Ngasup nge kita cirem aminna pe sangana ngalaken mbue perbeben? Melala ngaruh cirem si positif man banta ras man kalak si iciremi kita. Cirem sirehna i bas pusuh nari maba kesehatan dengen kedamen ku bas geluhta. Arah cirem enda pe ncidahken kekelengenta man kalak sideban, rawa kalak pe banci matek arah cirem. "*Damai dimulai dengan senyuman*" nina Mother Theresia. Cirem e gambaren lit perdamen, ras lit pertemanen. Andiko mbelinna ngaruh cirem enda. Adi bage selaku moria marilah si pebue cirem.